

Uunga siunnersuut: Kalaallit Nunaata nunasiaataanerani ingerlatsinermut pissutsit pillugit qulaajaasoqarnissaanut, tamatumunngalu atatillugu Danmarkip NP nunasiaataajunnaarsitsinermut piunasaqaataanik naammassinnissimanersoq suliassamik allaaserinnittoqarnissaanik Inatsisartunit akuersissutigineqartussatut aalajangiiffigisassaattut siunnersuut.

(Nunanut Allanut, Inuussutissarsiornermut Niuernermullu Naalakkersuisoq)

Akissuteqaat

(Nunanut Allanut, Inuussutissarsiornermut Niuernermullu Naalakkersuisoq)

Aappassaaneerneqarnera

Nunanut Allanut Sillimaniarnermullu Ataatsimiititaliap peqqissaartumik siunnersuummik suliaqarsimaneranut, isumaliutissiissutaanullu Naalakkersuisut qujapput.

Siunnersuutip siullermeerneqarnerani ilisimatusarfiit nunatsinneersut nukissaalatsinerat pissutigalugu qulaajaanissap kinguartinneqarnissaanik oqariartuut Inatsisartuni partiinit amerlanerussuteqarluartunit ilalerneqanngitsoq ataatsimiitsitaliap isumaliutissiissutimini ersersippaa.

Ataatsimiitsitaliap apeqqutaanut akissuteqarnissamut periarfissaqarsimaninnut, ataatsimiitsitaliamullu ilaasortanik oqaloqateqarsinnaasimaninnut qujanera matumuuna apuuppara.

Nunatta avataanit ilisimatusartunik suleqateqartoqarnissaanik periarfissamik mattussisoqannginnera Naalakkersuisunit maluginiarparput, taamaattorli nunatsinni ilisimatusarfimmit kalaallilu isaat atorlugit ilisimatusarnerup ingerlanneqarnissaa piunasaqaatigineqartoq aamma maluginiarlugu. Tamannalu qulaajaanissap aallartisarnissaanut periarfissanik nutaanik ammaassisinnaavoq, tamanna Naalakkersuisut misissoqqikkusuppaat.

Paasissutissanik katersinerup siammasissuunissaa ataatsimiitsitaliap isumaliutissiissutimini kaammattuutigigaa maluginiarakku oqaatigissavara, eqqarsalersippaangalu misissuinerup qaammatit 18-inik sivisussuseqarnissaanik ukiunik marlunnik sivisussuseqarnissaanut tikkuussisoq.

Naalakkersuisut qulaajaanissaq pillugu Ilisimatusarfimmik aallarniutigalugu oqaloqateqalernissartik isumalluarfigaat, uanilu ilanngullugu aningaasaliinissap annertussusaa pillugu.

Maluginiaqqussavaralu qulaajaaneq aningaasanut inatsisikkut akuersissutigeqqaarneqartussaassammat, tamannalu Inatsisartut naggataatigut aalajangertussaammassuk.

Taama oqaaseqarlunga Nunanut Allanut Sillimaniarnermullu Ataatsimiitsitaliap inassuteqaataa akuersissutigineqassasoq inassutigaaara.